

Martin Luther King III den un discurso emocionante

Mester rechasa maldad, pero keda stima e hende

MARTIN Luther King III a tene un discurso emociante durante e ceremonia di develo di estatua di Anne Frank. E tabata emocionada pa varios motibo, pero un di nan ta sigur despues di a tende con Rabbi Soetendorp a conta na un manera simpatico y amabel con el a yega di topa cu su tata y con tanto el a aprecia e encuentro ey, dos luna prome cu Martin Luther King Jr. a wordo asesina.

Den su discurso el a dirigi su mes na tur presente y specialmente n'e hobennan, pasobra nacionnan ta wordo husga con nan ta trata nan recursonan mas precioso y e muchanan sigur t'e recursonan mas precioso di un nacion.

King a bisa cu e y su señora Arndrea ta masha contento di por teynan pa observa e develo di e estatua di Anne Frank. Mundo masha poco ta para keto pa muestra con nos mester crea un mihor mundo pa tur e yiunan di Dios. "Mester solamente di un par di bon homber y muher pa haci e cambio. No semper t'e masa, pero t'e poconan aki cu a cambia mundo den un forma cu no por wordo midi".

King a conta e audiencia grandi

cu enberdad e tabata un mucha chikito ainda ora su tata a wordo mata. Un aña despues di e morto di su tata, un omo di dje a hoga den un forma misterioso. Cuatro aña despues su wela a wordo tira mata, sinta den misa tocando orgel.

Martin Luther King III a bisa di ta masha agradecido p'e mensahe cu su mama, su omonan y welo a siñe. Cu ta e mensahe di amor y pordon.

Pasobra cu semper ta facil pa tin sentimentonan di amargura. Lo tabata facil pa sinti odio contra hendenan blanco, pasobra ta un homber blanco a mata su tata. Of pa tin odio contro hendenan di color, pasobra ta un homber di color a mata su wela.

E ta bisa cu ta pesey mes e ta contento cu e no tin e sentimentonan ey dor di e educacion cu el a haya.

Un educacion cu a siñe pa rechasa actonanan di maldad, pero keda stima e hende.

"Nos mester siña pa tin e capacidat pa pordona otroonan y asina nos mundo lo bira un mihor lugar pa biba".

King a splica cu cada dia nos ta progresa den nos intento pa haci di e mundo aki un mihor lugar

pa biba. Cu pasonan chikito por ta, pero cada dia nos ta yega un poco mas serca di nos mision. El caba su discurso contando un storia cortico.

Con e y su rumannan a bishita hunto cu nan mama e scol secundario cu su mama Coretta Scott King a atende y eynan el a mira un estatua cu tabatin un inscripcion cu a haci un impacto grandi riba su vida.

E inscripcion ta bisa: "Sinti berguensa te dia cu bo gana un victoria pa humanidad". King a bisa cu podise tin hende cu por pensa cu e mensahe aki ta grandioso, pero no ta algo cu por cumpli cu ne sin mas.

Pero, loke e mensahe aki den realidad kier men ta pa trata haci un contribucion ora y unda bo por. Nos por haci esaki dor di yuda den nos becindario. Nos por haci esaki den nos comunidad of den nos ciudadnan, den estadonan y por ta den nos mundo. Mas importante di e mensahe aki ta cu mester sinti berguensa te ora bo a haci algo aunke ta chikito pa haci e mundo riba cua nos tur ta biba un poco mihor cu e tabata prome cu bo a yega".

